

Penyertaan penuntut tingkat imej PDRM


KUALA LUMPUR - Idea pemikiran lateral penuntut universiti yang menyertai pasukan sukarelawan polis dapat memberikan input bagi menambah baik usaha dan imej pasukan Polis Diraja Malaysia (PDRM).

Raja Muda Perak, Raja Dr Nazrin Shah bertitah, penuntut dapat membantu PDRM melakukan penyelidikan dan kajian serta memperlengkapkan pasukan polis dengan data dan maklumat berharga dengan menjadi sukarelawan polis.

"Pemikiran dinamik dan radikal penuntut wajar diterokai, cetusan idea baru yang dihasilkan dari pemikiran lateral akan membolehkan pasukan polis senantiasa berada di hadapan.

"Gandingan disiplin alam akademik dengan profesion polis akan dapat membawakan idea-idea kreatif dan inovatif yang dinamik lagi produktif," titah Baginda pada Istiadat Perbarisan Tamat Latihan dan Penyampaian Sijil Pelantikan Kor Sukarelawan Polis Siswa/Siswi (Suksis) Institusi Pengajian Tinggi Awam 2010 di Universiti Malaya (UM) di sini.

Pada majlis itu, seramai



■ Raja Dr Nazrin Shah diiringi Ketua Polis Negara, Tan Sri Musa Hasan (belakang) melakukan pemeriksaan perbarisan.

1,023 anggota dari 19 institusi pengajian tinggi awam (IPTA) antaranya Universiti Malaya (UM), Universiti Sains Malaysia (USM), Universiti Kebangsaan Malaysia (UKM), Universiti Putra Malaysia (UPM), Universiti Malaysia Sabah (UMS) dan Universiti Teknikal Malaysia Melaka menerima sijil selepas menamatkan latihan.

Raja Nazrin bertitah, latihan asas itu menepati tahap keseragaman dan memberi input asas kepolician kepada penuntut akan tugas sebenar

PDRM.

"Penuntut adalah generasi yang memiliki idealisme serta berada dalam gedung ilmu pengetahuan dan jika sesi percambahan fikiran dapat dijadikan sebahagian dari pada komponen program Suksis, ia dapat memanfaatkan pasukan polis," titah baginda.

Raja Nazrin juga bertitah, polis dan media perlu bekerjasama secara proaktif, teratur dan terancang, bukannya bersifat reaktif bagi mengelak isu-isu yang boleh

mencetuskan polemik dan kontroversi.

Raja Nazrin bertitah, program komunikasi yang berkesan perlu diamalkan agar dapat merapatkan jarak maklumat dan salah faham antara polis dan masyarakat umum.

"Di samping menyampaikan mesej secara telus, jelas dan tepat, maklum balas dan pandangan masyarakat perlu dihargai supaya mereka memahami dan terus bersama polis," titah baginda. - Bernama